

萬有文庫

第一集一千種

王雲五主編

馬氏文通

(六)

馬建忠著

商務印書館發行

馬氏文通

(六)

馬建忠著

萬有文庫

第一集一千種

總編纂者

王雲五

商務印書館發行

馬氏文通

論句讀卷之十

首卷界說有言曰。凡有起詞語詞而辭意已全者曰句。未全者曰讀。起詞者。卽所志之事物也。語詞者。事物之動靜也。故欲知句讀之所以成。當先知起詞語詞之爲何。於是焉。第二卷之論名字代字者。所以知起詞之所從出也。後四卷之論動字靜字者。所以知語詞之所由生也。七卷之論介字者。爲夫起詞語詞之意或有不足也。則知所以足之者也。八卷之論連字者。爲夫語詞與語詞之或相承轉也。則知所以維繫之者也。九卷之論助字者。爲夫語詞辭氣之有疑有信也。則知所以傳之者也。猝有所感。則辭氣不及傳而發而爲聲者。附以歎字終焉。字分九類。凡所以爲起詞語詞者盡矣。至進論夫起語兩詞之成爲句。成爲讀者。是則此卷之所由作也。然此卷所論者。有已散見於前者。有未見者。今則散見者總之。未見者補之。支分節解。先綱後目。綱以象之。目以系之。

象一起詞

凡句讀各有起詞。爲起詞者。名代頓豆四者。皆習見焉。

句也。讀也。皆所以語或動或靜之情也。所謂語詞也。而動靜之情不能不有所從發。其所從發者起詞。

也。然則起詞者，非他，卽所發動靜之情之事物也。此起詞所以爲句讀所必需也。爲起詞者，名字與代字固已，而頓與豆之用如名字者，其爲起詞亦習見也。

論語云：子見南子。子路不說。子曰：予所否者，天厭之。天厭之。此節六句，皆有起詞。第四句之起詞，代字也。第二句之起詞，本名也。他句皆以公名爲起詞。隱公三年云：鄭武公莊公爲平王卿士。王貳于虢。鄭伯怨王。王曰：無之。故周鄭交質。王子狐爲質於鄭。鄭公子忽爲質於周。王崩，周人將畀虢公政。四月，鄭祭足帥師取溫之麥。秋，又取成周之禾。周鄭交惡。共十二句內，惟秋又取成周之禾一句起詞連上。他句皆有起詞。論語云：有子曰：其爲人也孝弟，而好犯上者，鮮矣。不好犯上而好作亂者，未之有也。君子務本，本立而道生。孝弟也者，其爲仁之本與。此節句與讀共計有十。有子曰：第一爲句。有子其起詞也。其爲人也，第二爲讀。其代字起詞也。孝弟而好犯上者，第三爲讀。者代字起詞也。鮮矣，第四爲句。孝弟而好犯上者之讀，乃其起詞也。不好犯上而好作亂者，第五爲讀。者代字起詞也。未之有也，第六爲句。第五讀乃其止詞也。君子務本，第七爲句。君子起詞。本立而道生，第八爲雙扇之句。本與道其起詞也。孝弟也者，一頓。本句之起詞，其爲仁之本與，第八爲句。此節之爲起詞，有豆有頓，而句讀亦各有起詞。學者可玩索也。孟子云：孔子懼，作春秋。春秋，天子之事也。是故孔子曰：知我者其惟春秋乎？罪我者其惟春秋乎？此節句讀有八。孔子懼，一讀。孔子其起詞。作春秋，二句。第一讀其起詞也。春秋，天子之事。

也。三句春秋起詞。是故孔子曰。四句孔子起詞。知我者五讀。者代字起詞也。其惟春秋乎。六句第五讀其起詞也。罪我者七讀。其惟春秋乎。八句皆同上。又貨殖列傳云。是以無財作力。少有鬪智。既饒爭時。三平句起詞爲無財。少有既饒。三頓。平準書云。守閭閻者食梁肉。爲吏者長子孫。居官者以爲姓號。三句起詞皆讀也。閔二年云。內寵並后。外寵二政。嬖子配嫡。大都耦國。亂之本也。此節首三讀。其起詞皆爲頓。末句則前三讀。乃其起詞也。襄公八年云。敝邑之衆。夫婦男女不遑啓處。以相救也。一句。敝邑之衆一頓起詞也。夫婦男女又一頓。與前頓同次。

系一議事論道之句讀。如對語然。起詞可省。

論語云。子曰。道千乘之國。敬事而信。節用而愛人。使民以時。四單句。皆無起詞。蓋泛論治國。起詞卽治國之人也。又賢賢易色。章皆無起詞。蓋論立身之道也。他如信近於義。章貧而無諂。章爲政以德。章又學而章。大抵論議句讀。皆泛指。故無起詞。此則華文所獨也。泰西古今方言。凡句讀未有無起詞者。淮陰侯列傳云。蓋聞天與弗取。反受其咎。時至不行。反受其殃。四句。弗取不行者誰。受咎受殃者又誰。皆未指明。蓋公論也。穀梁僖公傳二十二年云。倍則攻。敵則戰。少則守。三平句。無起詞。論治兵也。僖公十五年云。古者大事。必乘其產。乘者爲誰。不言可知。則陽云。舊國舊都。望之暢然。雖使丘陵草木之緝入之者十九。猶之暢然。句中望之者誰。未明言也。所引皆同上。史籍凡議事論道。其句讀概無起詞也。

又肱篋起句。卽云將爲肱篋探囊發置之盜。而爲守備云云。送高閑上人序起云。苟可以寓其巧智云云。兩篇起句。卽無起詞。振起有勢。

論語云。子曰忠矣。曰仁矣乎。曰未知焉得仁。忠矣與仁矣乎。皆對語答問之句。起詞在上。故本句可刪。又云。入曰。伯夷叔齊何人也。曰古之賢人也。曰怨乎。曰求仁而得仁。又何怨。此亦對語答問也。又云。顏淵季路侍。子曰。盍各言爾志。子路曰。願車馬云云。顏淵曰。願無伐善云云。此亦問答之辭。隱公元年云。欲與大叔。臣請事之。若弗與。則請除之。無生民心一節。與而弗與者。公也。對語故不言。又公曰。無庸將自及。答辭無起詞。隱公三年云。若棄德不讓。是廢先君之舉也。豈曰能賢。一讀兩句。皆無起詞。公自言也。凡問答之句。起詞有無無定。一視辭意之所順而已。諍臣論云。問其官。則曰諫議也。問其祿。則曰下大夫之秩也。兩答皆無起詞。成公十六年云。騁而左右何也。曰召軍吏也。皆聚于中軍矣。曰合謀也。張幕矣。曰虔卜於先君也。徹幕矣。曰將發命也。甚囂且塵上矣。曰將塞井夷竈而爲行也。皆乘矣。左右執兵而下矣。曰聽誓也。戰乎。曰未可知也。乘而左右皆下矣。曰戰禱也。八問八答。皆無起詞。所指已明。不言可知。

系二命戒之句。起詞可省。

論語云。子曰。毋以與爾鄰里鄉黨乎。此禁止之辭。與者何人。不明言。其實猶對語者然。襄公十四年云。

來姜戎氏十八年又云止將爲三軍獲不止將取其衷宣公十二年云進之襄公二十三年云矢及君屋死之穀梁僖公五年云入自明山木云少君之費寡君之欲雖無糧而乃足以上所引皆非戒卽命之辭而皆無起詞如對語者然又凡有所爲條誠者亦然孟子云初命曰誅不孝無易樹子無以妾爲妻再命曰尊賢育才以彰有德云云商君列傳云不告姦者腰斬告姦者與斬敵首同賞匿姦者與降敵同罰民有二男以上不分異者倍其賦云云兩引一盟一誡諸句皆無起詞

系三讀如先句句之起詞已蒙讀矣則不復置

孟子云寡人之於國也盡心焉耳矣寡人之於國也一讀冒下句寡人起詞已蒙讀矣下句盡心焉耳矣之起詞可不重提論語云吾少也賤吾代字既爲少也一讀之起詞又爲賤字一句之起詞而吾字已蒙乎讀則下句不復提矣襄公四年云昔周辛甲之爲太史也命百官箴王闕一讀一句周辛甲蒙讀而爲下句之起詞其二十一年云於是祁奚老矣聞之乘駟而見宣子祁奚乃讀句之起詞陸賈列傳云今足下反天性棄冠帶欲以區區之越與天下抗衡爲敵國足下旣爲兩讀之起詞又爲下句之起詞叔孫通列傳云叔孫通知上益厭之也說上曰同上由是魏其列傳云丞相入奏事坐語移日汲鄭列傳云黯學黃老之言治官理民好清淨高祖紀云蕭曹等皆文吏自愛恐事不就後秦種族其家盡讓高祖淮陰侯列傳云今足下戴震主之威挾不賞之功歸楚楚人不信歸漢漢人震恐賈捐之

傳云。今陛下不忍區區之忿。欲驅士衆擠之大海之中。快心幽冥之地。非所以救助饑饉保全元元也。李斯列傳云。是以泰山不讓土壤。故能成其大。河海不擇細流。故能就其深。王者不卻衆庶。故能明其德。周語云。昔者先王之有天下也。規方千里。以爲甸服。以供上帝山川百神之祀。以備百姓兆民之用。以待不庭不虞之患。應帝王云。至人之用心若鏡。不將不逆。應而不藏。送殷員外序云。今人適數百里出門惘惘有難別可憐之色。持被入直三省。丁寧顧婢子語。刺刺不能休。今子使萬里外國。獨無幾微出於言面。豈不真知輕重大丈夫哉。諸所引皆同前爲讀句之式之多變也。故繁引焉。使閱者有所玩索也。

系四句讀起詞。既見於先。而文勢直貫。可不重見。

論語云。子張曰。士見危致命。見得思義。祭思敬。喪思哀。其可已矣。子張曰。後凡五句。皆以士爲起詞。而既見於首句。以其文勢直貫至終。故士字不復再見矣。大學云。身有所忿懣。則不得其正。有所恐懼。則不得其正。有所好樂。則不得其正。有所憂患。則不得其正。共計讀四句四。皆以身爲起詞。而身只見於首句。後則不復見矣。又云。人之其所親愛而辟焉。云云。共計讀五句五。同上。皆以人字爲起詞也。荀子榮辱篇云。彼臭之而噤於鼻。嘗之而甘於口。食之而安於體。則莫不棄此而取彼矣。共計讀三句四。除收句外。皆以彼代字爲起詞也。論語鄉黨一章。惟第一句記孔子。以下凡記孔子之行事。皆無起詞。而

一言君子不以紺紱飾。一言子退朝而已。不特此也。又凡句讀起詞所指之字。無論其爲起詞爲止詞。旣已先見矣。則文勢直下。以後起詞皆可不提。僖公二十五年云。晉侯朝王。請隧。弗許。與之陽樊。溫原。欒茅之田。共四句。晉侯朝王句。晉侯起詞。王止詞也。請隧之起詞。晉侯也。弗許之起詞。王也。與之之起詞。亦王也。以晉侯與王一爲起詞。一爲止詞。旣已先見矣。故以後諸句之起詞。皆未再見者。此也。莊公九年云。期戍。公問不至。請代。弗許。故謀作亂。又云。反。誅屢於徒人費。弗得。鞭之。見血。走出。遇賊於門。昭公二十八年云。退朝。待於庭。召之。比置饋。入三歎。旣食。使坐。哀公十六年云。乃從白公而見之。與之言。悅。告之。故辭。承之以劍。不動。諸引皆短句。魚貫而下。而每句起詞不一。然旣見於先。故不復置。天運云。且子獨不見夫桔槔者乎。引之則俯。舍之則仰。彼人之所引。非引人也。故俯仰而不得罪於人。共計讀三句五。蓋引之舍之兩讀起詞。乃桔槔者。則俯則仰兩句起詞。卽桔槔也。人之所引。又一讀也。後兩句。則以彼字爲起詞矣。

系五。無屬動字。本無起詞。有無兩字。間亦同焉。

此見第四卷。無屬動字與同動字下。

系六。有不用起詞本字。而以公共之名代之者。如人以地名是也。

此見第二卷名字篇矣。而未詳也。平準書云。河南上富人助貧人者籍。河南指大吏。此以地代人也。梅

福傳云。是以天下布衣。各勵志竭精。以赴闕庭。以布衣代衣之者。又云。廟堂之議。非草茅所當言也。草茅以代居之者。定公三年云。聞諸道路。路信否。道路以代行之者。陸賈列傳云。今辟陽侯幸太后。而下吏道路皆言君讒。欲殺之。道路同上。平準書云。布告天下。天下莫應。天下代人。貨殖列傳云。海岱之間。斂衽而往朝焉。海岱之間。以代居其間者。伯夷列傳云。然至近世。操行不軌。專犯忌諱。而終身逸樂富厚。累世不絕。近世累世。皆代其人。諸引公共之名。以爲代者。皆起詞也。然止詞轉詞。亦可用也。此舉起詞以概耳。

系七句讀內有同指一名以爲主次。爲賓次。或爲偏次者。往往冠其名於句讀之上。一若起詞者然。避重名也。

論語云。夫顓臾。昔者先王以爲東蒙主。且在邦域之中矣。是社稷之臣也。何以伐爲。夫顓臾三字。冒起一若起詞者然。第一讀。猶云先王以顓臾爲東蒙主也。是顓臾乃以字後之止詞。則爲賓次。第二讀。猶云且顓臾在邦域之中矣也。則顓臾在主次。是社稷之臣也。一句。猶顓臾是社稷之臣也。則顓臾又在主次。今顓臾冒之於先。故以後句讀內所當位之者。皆隱指焉。孟子云。子路人告之以有過則喜。猶云人告子路以有過。子路則喜也。今子路弁首。故於讀之賓次。則以之字代焉。下句主次則隱指焉。論語云。寧武子。邦有道則知。邦無道則愚。猶云邦有道寧武子則知也。孟子云。今夫薤麥播種而耰之。其地

同樹之時又同。淳然而生。至於日至之時。皆熟矣。麤麥二字。若不弁首。則句讀內皆當補出。豈不重累生厭哉。論語云。仁者。雖告之曰。井有仁焉。其從之也。仁者居首。指之者。告字後之賓次也。從字前之主次也。逍遙遊云。是鳥也。海運則將徙於南冥。是鳥先置。則字後主次指之。又云。之人也。物莫之傷。大浸稽天而弗溺。大旱金石流土山焦而不熱之人也。先置。以爲傷字後之賓次。與弗溺不熱先之主次也。游俠列傳云。殺者亦竟絕。莫知爲誰。殺者乃爲誰之主次也。東方朔傳云。天不爲人之惡寒而輟其冬。地不爲人之惡險而輟其廣。君子不爲小人之匈匈而易其行。天字乃輟其冬之主次也。下倣此。趙充國傳云。臣位至上卿。爵爲列侯。犬馬之齒七十六。爲明詔填溝壑。死骨不朽。亡所顧忌。臣字乃填溝壑之主次。而爲前三讀之偏次也。猶云。臣之位。臣之爵。臣之犬馬之齒也。食貨志云。夫珠玉金銀。飢不可食。寒不可衣。然而衆貴之者。以上用之故也。夫珠玉金銀。冒於句讀之上。而句讀賓次胥指焉。莊老列傳云。鳥吾知其能飛。魚吾知其能游。獸吾知其能走。三讀。其字各指其前置之名。此獲麟解。角者吾知其爲牛。鬣者吾知其爲馬。犬豕豺狼麋鹿。吾知其爲犬豕豺狼麋鹿。三句之由來也。又平淮西碑表文序云。乾坤之容。日月之光。知其不可繪畫。強顏爲之以塞詔旨。罪當誅死。諸句調亦胎於此。人間世云。夫粗黎橘柚果蓏之屬。實熟則剝。則辱。大枝折。小枝泄。此以知其能苦其生者也。一頓冠首。而爲剝辱與能苦諸豆之主次。論語云。由也。千乘之國。可使治其賦也。賦者。千乘之國之賦也。故千乘之國先置。

以爲止詞之偏次也。又云求也。千室之邑。百乘之家。可使爲之宰也。爲之宰者。猶云爲其宰也。又云三軍可奪帥也。匹夫不可奪志也。猶云三軍之帥也。匹夫之志也。文帝紀云。細大之義。吾未能得其中。宣公二年云。疇昔之羊。子爲政。今日之事。我爲政。猶云子爲之政。我爲之政也。循吏列傳云。凡治道去其泰甚者耳。猶云。凡治道。惟求去治道之泰甚者也。近五引。皆先置一頓。以爲下文偏次所指之地。復上書云。如周公之心。設使其時。輔理承化之功。未盡章章如是。而非聖人之才。而無叔父之親。則將不暇食與沐矣。豈特吐哺握髮爲勤而止哉。如周公之心。一頓。有似空置。并諸句讀之首。然實爲設辭諸讀之起詞也。異於本例。猶云。按周公心內之意。見其時誠如是矣。則將云云也。又胙篋云。昔者容成氏。大庭氏。伯皇氏。中夷氏。栗陸氏。驪畜氏。軒轅氏。赫胥氏。尊盧氏。祝融氏。伏羲氏。神農氏。當是時也。民結繩而用之。歷數諸氏先置。與下文毫不相涉。其實猶云。昔當諸氏之時也。禮書云。人體安駕乘。爲之金輿錯衡以繁其飾。目好五色。爲之黼黻文章以表其能。耳樂鐘磬。爲之調諧八音。以蕩其心。口甘五味。爲之庶羞酸醎。以致其美。情好珍善。爲之琢磨圭璧。以通其意。五排。以人字并之。先爲五讀起詞之偏次。猶云。人之體。人之目。人之耳。人之口。人之情也。而後爲五句之起詞。猶云。人爲之云云也。又馬蹏云。馬蹏可以賤霜雪。毛可以禦風寒。齧草飲水。翹足而陸。此馬之真性也。馬字冠首。而後猶云。馬之蹏。馬之毛也。齧草句。馬爲主次。故與所引禮書同例。釋言云。若夫狂惑喪心之人。蹈河而入火。妄言而罵詈。

則有之矣。而愈人知其無是疾也。文家謂此句以而愈一轉。先提愈字醒目。實則與鳥吾知其能飛句同法。此例爲華文所獨。故不憚繁引如是。

象二語詞

凡句讀必有語詞。語詞後而起詞先者。常也。言語詞。則內動外動。受動與凡爲表詞者。皆賅焉。

語詞之說。已見象一下之解矣。引句亦同。論語云。哀公問社於宰我。宰我對曰。夏后氏以松。殷人以柏。周人以栗。曰。使民戰栗。六句之起語兩詞皆備。惟戰栗兩字。內動字而爲語詞者也。餘皆外動字。揚雄傳云。昔者禹任益虞。而上下和。草木茂。成湯好田。而天下用足。文王之囿百里。民以爲尙小。齊宣王囿四十里。民以爲大。裕民之與奪民也。句讀有十煞句。無起詞。餘則兩詞皆備。其語詞則有內動。有外動。有表詞也。論語云。子曰。管仲之器小哉。或曰。管仲儉乎。共四句。小哉儉乎兩表詞。而爲句之語詞也。兩引諸句。皆起詞先乎語詞。隱公三年云。衛國褊小。老夫耄矣。桓公十三年云。舉趾高。心不固矣。其六年云。漢東之國。隨爲大。隨張。必棄小國。小國離。楚之利也。所引褊小耄矣。趾高固矣。爲大。與楚之利也。皆表詞。而爲句之語詞。此公例也。諸引句皆可證焉。

系一詠歎語詞。率先起詞。

論語云。大哉。堯之爲君也。大哉。語詞。堯之爲君也。起詞。而反後焉。此已散見於助字篇矣。襄公二年云。

免寡人。惟二三子。成公二年云。異哉。夫子有三軍之懼。而又有桑中之喜。宜將竊妻以逃者也。論語云。難乎免於今之世矣。徐無鬼云。久矣。夫莫以真人之言。譬歎吾君之側乎。鬼谷子與蘇秦張儀書云。夫女愛不極席。男歡不卑輪。痛哉。夫君所引皆詠歎之句。其語詞率助助字。而先乎起詞。經生家以鮮矣。仁三字爲句法之奇。然鮮矣助字。與前引同。惟宣公二年云。睥其目。皤其腹。棄甲而復。睥與皤。皆隻字爲表詞。而先乎起詞者。是爲奇耳。經籍中未之重見。周語因之云。民所曹好。鮮其不濟。民所曹惡。鮮其不廢。猶云。民所同好。其不濟者鮮矣。下句倣此。

系二何字詢問。有先起詞者。惟爲表詞則然。

孟子云。鄰國之民不加少。寡人之民不加多。何也。公羊隱公元年云。元者何。君之始年也。二引何字。皆爲表詞。後置常也。論語云。何哉。爾所謂達者。孟子云。何哉。君所謂踰者。所引何字。皆表詞。先置已見代字篇矣。

系三排行句讀。坐動同者。一見而已。下句可省。

凡內外動字。以言起詞之情者。曰坐動。僖公十五年云。晉侯許賂中大夫。旣而皆背之。賂秦伯以河外列城五。東盡虢略。南及華山。內及解梁城。旣而不與。晉侯許三字。晉侯起詞也。許坐動也。所許者。賂中大夫與賂秦伯也。而賂秦伯之坐動字。爲許字。同乎首句。故刪之。孟子云。吾聞其以堯舜之道要湯。未

聞以割烹也。吾聞後兩排讀。坐動字卽要湯也。故第二讀內刪去。隱公元年云。先王之制。大都不過參國之一。中五之一。小九之一。是猶云。大都不過參國之一。中都不過五國之一。小都不過九國之一也。今以三句同式。故後二句。凡與首句同者。盡刪矣。襄公二十一年云。若大盜禮焉。以君之姑姊。與其大邑。其次阜牧與馬。其小者衣裳劍帶。是賞盜也。三讀坐動。皆禮焉外動字。故只一見。自序云。年十歲。則誦古文。二十而南游江淮。不曰年二十者。年字已先見也。高帝紀云。呂后具言。客有過相我子母。皆大貴。高祖追問。老父曰。鄉者夫人兒子皆以君。猶云。皆以君貴也。不言貴者。已見於前也。吳王濞列傳云。能斬捕大將者。賜金五千斤。封萬戶。列將三千斤。封五千戶。裨將二千斤。封二千戶。二千石千斤。封千戶。千石五百斤。封五百戶。皆爲列侯。首句能斬捕三字。讀之坐動也。賜金首句之坐動也。皆一見耳。後從刪。屈原列傳云。儀與王約六里。不聞六百里。省一約字。庚桑楚云。蹶市人之足。則辭以放鷲。兄則以嫗。大親則已矣。第一讀與第一句皆全。以後兩讀兩句。凡同者皆刪矣。不刪則云。蹶兄之足。則辭以嫗。蹶大親之足。則不辭矣。如此句法。原不概見。茲舉數則。以示隅耳。又所謂坐動者。卽句讀之語詞也。系四。此擬句讀。凡所與比者。其語詞可省。

此節已散見於前。今特爲發明語詞之可省耳。貨殖列傳云。夫千乘之王。萬家之侯。百室之君。尙猶患貧。而況匹夫編戶之民乎。其與王侯君比者。匹夫編戶之民也。其語詞省而不書。是猶云。而況匹夫編

戶之民能不患貧乎。李廣傳云。如浞野侯爲虜所得。後亡還。天子客遇之。況於將軍乎。猶云。況於將軍還。天子又當何如乎。陳湯傳云。夫犬馬有勞於人。尙加帷蓋之報。況國之功臣者哉。猶云。況國之功臣其應得之報。當何若哉。燕策云。隗且見事。況賢於隗者乎。人間世云。鬼神尙來舍。而況人乎。同上。刺客列傳云。誠得刳秦王使悉反諸侯侵地。若曹沫之與齊桓公。則大善矣。猶云。若曹沫之與齊桓公。使反魯地也。今省使反魯地四字。如此句法。已見於六卷狀字九卷助字矣。故不繁引。

又凡差比平比。其所爲比之字。寓於其中。概不言也。所爲比者。卽語詞也。故比擬之句。語詞可刪者。此也。孟子云。以齊王由反手也。猶云。以齊王之易。猶反手之易也。易靜字而爲表詞。卽兩比句之語詞也。此平比也。孟子云。季氏富於周公。猶云。季氏之富。更富於周公之富也。兩人之富。卽所以比也。皆省而不書。此差比也。亦已詳於三卷論比章矣。

系五句讀表詞。往往以名代頓豆爲之者。而起表兩詞之間。無斷辭爲間者。常也。

此亦散見於前卷矣。而特詳於三卷之表詞篇。隱公元年云。公曰。制巖邑也。巖邑。本名。而爲表詞也。制其起詞也。中無斷辭。如爲是卽之類。惟非字不省。又云。今京不度。非制也。制。公名。而爲表詞。加非字以決其不然。孟子云。又曰。持其志。無暴其氣者。何也。何詢問代字。而爲表詞。起詞一讀。無斷辭間焉。隱公十一年云。我周之卜正也。我起詞。周之卜正。偏次之頓。表詞也。中無斷詞參焉。宣公十二年云。夫武。禁